

UNTUK SIARAN SEGERA



KEMENTERIAN PENDIDIKAN

KENYATAAN MEDIA

MALAYSIA LAKAR SEJARAH, DILANTIK KE LEMBAGA EKSEKUTIF UNESCO BAGI PENGGAL 2025-2029

Malaysia melakar sejarah gemilang di persada antarabangsa apabila berjaya dipilih sebagai Ahli Lembaga Eksekutif Pertubuhan Pendidikan, Sains dan Kebudayaan Bangsa-Bangsa Bersatu (UNESCO) bagi penggal 2025 hingga 2029. Pemilihan ini diumumkan pada Persidangan Agung UNESCO Ke-43 di Samarkand, Uzbekistan.

Menteri Pendidikan merangkap Presiden Suruhanjaya Kebangsaan UNESCO Malaysia, YB Fadhlina Sidek menyifatkan kejayaan ini sebagai pengiktirafan dunia terhadap kepimpinan, sumbangan dan keupayaan Malaysia dalam memacu agenda global pendidikan, sains dan kebudayaan demi kesejahteraan global yang inklusif dan mampan.

Menurut beliau, "Mewakili Malaysia, saya merakamkan setinggi-tinggi penghargaan kepada semua negara anggota UNESCO yang telah memberikan kepercayaan ini. Kejayaan ini adalah hasil usaha bersama dari pasukan Suruhanjaya Kebangsaan UNESCO Malaysia, Kementerian Pendidikan, Pejabat Delegasi Tetap Malaysia ke UNESCO di Paris, Kementerian Luar Negeri serta rakan-rakan strategik yang sentiasa komited memperjuangkan kepentingan bersama di peringkat global."

Pemilihan Malaysia adalah amanah untuk memastikan suara negara-negara membangun, khususnya di rantau Asia Tenggara dan Asia Pasifik, terus didengari dan dihormati. Ia menyerlahkan komitmen berterusan negara untuk membina masa hadapan yang lebih inklusif, aman dan lestari untuk generasi akan datang.

Malaysia akan terus menjadi rakan yang strategik, proaktif dan konstruktif di UNESCO, memacu dasar dan inisiatif yang memartabatkan pendidikan berkualiti, memperkukuh sains dan teknologi untuk pembangunan mampan, serta memelihara warisan budaya dan alam sekitar dunia.

Menerusi mandat baharu ini, Malaysia akan memainkan peranan strategik dalam membentuk hala tuju UNESCO untuk empat tahun akan datang, sejajar dengan aspirasi Malaysia MADANI dan Agenda Matlamat Pembangunan Mampan 2030.

TAMAT

**KEMENTERIAN PENDIDIKAN
7 NOVEMBER 2025**